



滿漢大臣列傳

卷三十七

鄂輝

恭阿拉

七十五

宗室弘豐

鄂輝滿洲正白旗人姓碧魯乾隆三十六年由前鋒校分發四川試用守備三十七年建昌鎮松嵩營守備三十八年六月隨將軍阿桂攻勦金川敘功

賞戴花翎擢寧越營都司三十九年八月擢廣東潮州鎮遊擊四十年五月擢湖北興國營參將四十一年擢貴州上江協副將四十二年四月調成都將軍標中軍副將四十五年九月擢四川建昌鎮總兵四十六年五月隨大學士阿桂進勦蘭州逆回

賞法什尙阿巴圖魯名號四十八年六月擢雲南提督五十一年三月調成都將軍十一月奏言新疆屯練民戶承墾地畝原借牛價口糧請寬限征還得

旨豁免五十二年正月署四川總督八月將軍福康安勦臺灣逆匪鄂輝奉調帶領四川屯練降番赴閩十月得

旨鄂輝久歷行陣於軍旅較爲諳習着授爲參贊協同福康安悉心籌辦進勦十一月隨福康安渡海由鹿仔港赴援諸羅鄂輝堵截東莊溪橋攻克牛碭山竹柵諸羅圍解追至大排竹痛殲之及我軍進逼斗六門賊衆從山上撲殺鄂輝分領兵練衝截之賊奔逸進攻大埔林大埔尾二莊殺獲無算賊潰首逆林爽文由大里杙逃入內山番界鄂輝同各將弁追至集集埔五十三年正月擒獲之

上以鄂輝等勇略最著令臺灣郡城及嘉義縣建祠塑像並命畫像紫光閣

御製贊曰無前出力屯練之兵將軍鄂輝實率以行覆穴摧壘到處功成勇而有謀覃國之英敍功

賞戴雙眼花翎雲騎尉世職七月詣熱河

陛見旋回任時巴勒布滋擾西藏佔濟隴聶拉木等處

上命鄂輝馳驛抵川與提督成德帶兵赴勦復

命侍郎巴忠馳赴後藏偕鄂輝等查辦九月

諭曰據慶林奏賊匪紛紛退去自係聞知內地大兵將到預爲

奔竄之計鄂輝成德正應會合兵力趕緊行走乘勝追殺斷不可因有賊匪敗逃信息進兵稍遲又致緩誤事機也十月諭曰昨據成德奏仲巴呼圖與章嘉呼圖克圖私自差人與賊衆說和鄂輝摺內於講和一事竟未提及未免存將就完事之見巴勒布賊衆擅敢侵犯後藏邊界業經內地派兵前往若不示以兵威將來大兵全撤設復潛來滋擾勢必又當紛紛徵調疲於奔走尙復成何事體鄂輝等若尙能趕工痛加殲戮固屬甚善倘賊去已遠不值爲窮追之計亦應將巴勒布附近邊界地方奪取一二處使之震懾始能竣事鄂輝等不可不遵照妥辦也五十四年六月鄂輝偕成德巴忠舒濂普福等奏收復巴勒布侵佔藏地設站定界事宜一前藏向駐綠營官兵五百十員名現有駐藏大臣管轄其扎什倫布地方亦應酌撥綠營官兵分駐請於察木多抽撥外委一員兵六十名江卡抽撥兵三十名碩板多抽撥都司一員兵二十名前藏抽撥兵四十名以上四處共抽撥兵一百五十名卽令抽撤之都司外委管領移駐後藏再於馬兵內挑拔二名作爲軍功外委管束兵丁再後

藏既移駐官兵由後藏至前藏一路應分立塘汛十三處以唐古忒番兵安設每塘挑選附近番兵四五名並交噶布倫等辦給口糧均令駐防後藏都司隨時稽查管束一拉子地方請添設唐古忒番兵二百名并添第巴二名管領按年一次更換至脅噶爾番兵亦不敷防守請於拉子防兵內撥出三十名安置脅噶爾地方其薩喀一處距拉子不遠亦卽於防兵內撥出三十名輪赴該處巡哨再宗喀聶拉木濟隴等處遠在極邊其緊要處所仍須修砌卡隘堅礮以資瞭望而嚴防守一西藏官兵以耕牧爲生現飭噶布倫等按寨落多寡編定數目前藏派唐古忒兵八百名後藏四百名於每歲九月望後操演至十月底止隨同綠營駐防一體練習至操演鎗箭於綠營內挑取千把弁兵數十名充爲教習令其分領番兵逐日操演唐古忒兵向無錢糧令定於派出操演日期至散操日止令噶布倫等酌給口糧又達木兵向往達木角地方換班應差令并歸操演番兵內一體教習仍照舊令達賴喇嘛月給口糧又查達賴喇嘛山上舊存大小鐵礮二十餘位請編定號數令綠營兵帶領番兵

演習施放一請於今歲秋收後查明稞麥時值動項發交該噶
布倫等在附近各處買米稞麥三千石交駐藏糧員於扎什倫
布城內建倉收貯俟採買二年後按年出陳易新以六千石常
貯爲額至拉里察木多巴塘裏四處糧台皆有糧員而察木多
尤爲川藏適中之地亦請一體儲備一西藏所屬寨落設立第
巴管理缺分甚多其間美惡不齊然皆有應辦事件請令噶布
倫等嗣後無論缺分美惡一體補放務令該第巴親往照料不
許擅差家丁代理至差遣堪布囊蘇赴京進貢并赴打箭鑪辦
茶皆係經行內地往返需時請嗣後均由駐藏大臣會同達賴
喇嘛及噶布倫等揀選妥人給與護牌將需用馬夫酌定數目
注明牌內沿途照給以杜需索一駐藏大臣應於二人內按年
分爲兩次輪赴後藏巡查之便親加操演分別勸懲至藏衆散
居各處耳目難周該處設有噶布倫四人管理地方事務嗣後
請於四人內年輪派一人於春秋農隙時親往稽查一從前駐
藏大臣二員同居一處自珠爾默特納木扎勒滋事後房屋入
官始行分駐查前藏之撒木珠康撒爾住房卽係從前珠爾默

特納木扎勒舊居其地房屋寬敞足敷駐藏大臣二人分駐且同居一處遇有公事即可隨同商辦一西藏貿易外番必須老成謹慎之第巴協同該處頭目專管卡契回民及巴勒布平日悉心撫馭不許互相欺壓爭競以便秉公調處仍責令噶布倫訪等隨時察倘有第巴頭人及官弁兵役倚勢勒買苦累外番卽稟駐藏大臣拏究一向來西藏遇有訟事係歸管理刑法頭人朗仔轄聽斷俱照夷例分別重輕罰以金銀牛馬減免完結恐有高下等弊現在告知達賴喇嘛及噶布倫等凡有關涉漢回外番等事均令朗仔轄呈報揀員會審理一聶拉木濟隴絨峽三處均與巴勒布連界邇來販運日多巴勒布馱載貨物來藏貿易者第巴收稅加至十分之一易致爭執以後止准減半收取並令勒牌界所長遠遵循一西藏鹽斤於沙土中刨出本不潔淨應卽挖出時交該處第巴查驗鹽斤成色酌中定價毋許故昂任意勒買一駐藏大臣衙門向挑官兵應役均無定額將備以下從而效尤應酌定名數按期更換至駐藏大臣差遣官兵赴省製辦賞號之事有曠操防應咨明本省總督飭有司

代辦遇便帶藏並飭禁兵丁雇役番婦以肅營伍一西藏噶布倫戴綳第巴等缺辦理地方管束兵民均關緊要遇有缺出應於誠實勤妥之子弟中慎選承充至第巴營官商卓特巴等不下二三百缺逐一奏補未免過繁應請將大處緊要地方缺出調驗補放其偏遠第巴等缺出仍令達賴喇嘛自行選擇一理藩院司員並駐藏遊擊向未議給關防懇勅部鑄給辦理藏番事務章京關防一顆駐藏遊擊關防一顆俾辦事呼應較靈一宗喀濟隴聶拉木等處爲巴勒布往來門戶收稅行鹽等事均關緊要現在噶布倫揀派第巴三人分頭安設又選老成能事戴綳駐劄脅噶爾地方統轄宗喀濟隴聶拉木三處就近稽查其缺較爲繁重請照阿哩第巴之例由部發給號紙以專責成一從前解赴打箭鑪口外兵餉皆係元寶迨後祇解碎銀但自省至藏萬里崎嶇倘有挫失各站易於推卸況番地買賣交易均以元寶成色爲足請嗣後仍照舊以元寶起運一西藏向有賞需一項係蒙

皇上軫念達木官兵素無錢糧將三十九族每年所交例馬銀

三百九十餘兩買辦緞布烟茶銀牌按年獎賞一次此外並無別欸今既添設唐古忒番兵按期操演經駐藏大臣親查自當照例獎賞請於川省閒欸內加給銀五百兩飭辦緞布烟茶銀牌等項備賞一口外至西藏一切事務向歸駐藏大臣管理但裏塘巴塘與川省較近皆有土司管理原非西藏所屬應劃分綜理請自南墩迤西一路凡屬西藏所管之地照舊歸駐藏大臣管理其巴塘迤東土司地方歸川省將軍督提衙門就近管理至江卡乍了察木多並移駐後藏各營汛台站統歸駐藏大臣總理其巴塘裏塘安設塘汛官兵就近歸阜和協副將兼轄一打箭鑪出口以至西藏向於文職內派委州縣丞倅武職內揀派遊擊都司守備千總分駐辦理均三年一次更換該文武等官員遠役三年往返將及四載向來期滿並無保題陞轉之途嗣後請令駐藏大臣照金川營屯各員三年期滿出具考語奏明咨送本省將軍督提考察保題仿照邊俸報滿之例一體陞用其駐防官兵遇換班之期亦須選派妥幹以資防守奏入下軍機大臣議行九月鄂輝偕成德舒濂普福等奏巴勒布貢

使沿途行走安靜自藏起程妥爲照料前進五十五年前藏達賴喇嘛之弟商卓特巴等在各商上漁利舞弊四月

命鄂輝赴藏查辦旋鞫實以商卓特巴等解京治罪十月擢四川總督五十六年廓爾喀侵佔聶拉木濟隴定日等處九月鄂輝偕提督成德帶兵進勦先是巴忠以駐藏大臣專擅藏務又素諳唐古忒言語因授意噶布倫丹津班珠爾與廓爾喀定議歲給三寶三百錠令退還侵地鄂輝等遂藉是議和竣事嗣因後藏措不給銀復致侵擾事

聞巴忠畏罪自盡

命鄂輝迅速進兵立功自贖十月奏言賊匪業已敗回不過在濟隴聶拉木一帶觀望拒守俟與成德抵藏設法攻取

諭曰賊匪現在濟隴聶拉木一帶正可帶兵星馳赴藏痛殲賊衆鄂輝身爲總督應將成德行程遲緩參奏星速帶兵趕上奮力勦戮乃計不出此坐失機會且鄂輝身在中途賊匪於搶掠後早經飽載而歸安得大言不慚爲此賊匪敗回之語着傳旨申飭

命將軍福康安由青海抵藏督兵

諭曰上次廓爾喀因鹽稅細務與唐古忒人等爭執鄂輝聽從巴忠謬爲辦理以致復滋事端朕格外加恩不卽問罪仍令帶兵赴藏立功自贖理應加倍奮勉尅期抵藏乃竟濡滯不前坐失機會其錯謬甚大鄂輝著革去總督賞給副都統銜駐藏辦事聽候福康安調度差遣五十七年二月鄂輝偕成德等攻克聶拉木寨賊匪及福康安抵藏鄂輝督辦糧運七月奏言沿途查催定日一路糧石馳往聶拉木接濟成德

上嘉獎之十月工部尙書和琳參奏鄂輝積壓糧運並壓擱廓爾喀表章貢物

諭曰鄂輝於糧運積壓姑念伊係總辦之員彼時又赴聶拉木一帶查催勢難兼顧尙非有心玩誤而廓爾喀呈進表貢匿不具奏鄂輝之罪實在於此邊外重務竟敢壅於上聞此而不嚴行查辦何以肅政治而飭官常著福康安等將鄂輝革職嚴切跟究旋福康安奏言鄂輝因貢品較少不合體制先發檄駁斥擬俟廓爾喀貢使到來再辦但未能先行具奏請鎖解刑部治

罪

命解回前藏永遠枷號五十八年貫罪回京

賞拜唐阿六十年四月加員外郎銜擢熱河總管嘉慶元年二月

賞給三等侍衛馳赴荊州軍營協勦邪匪三月

賞頭等侍衛四月

賞副都統銜八月調赴湖南軍營勦捕苗匪九月永保奏鄂輝於八月勦除鍾祥邪匪奮勇殺賊

命加太子少保並都統銜授湖廣提督十月抵湖南大壩角軍營十一月率兵由老石溝山梁攻克平隴寨旋進佔養牛塘山梁與德楞泰爲右路攻克菜冲土貫坡湖耳坳等處石卡進逼平隴後山復奪據馬頭山餘錦坡賊卡十二月由貴魚坡下溝深入繞出石隆山後扼要圍裹與領侍衛內大臣一等威勇侯額勒登保等併力攻克斬首逆石柳鄧擒獲石老喬竣功獻馘予三等男爵二年正月督兵擒獲吳廷義並各寨賊目旋留乾州查辦餘匪開通道路辦理撤兵善後各事宜九月擢雲貴總

督十二月抵黔撫勦狝苗匪並搜查安順興義及馬乃屯羅鍋背松林等處苗黨均得

旨交部議敘三年六月卒遺疏入

諭曰鄂輝自擢授雲貴總督以來辦理苗疆軍務一切事宜奮勉妥協著加恩入祀賢良祠其前賞三等男爵卽着伊長子鄂彌善承襲

賜卹如例諡恪靖四年十月以鄂輝前在湖北辦理教匪時於軍需項內得受餽送銀四千兩

命撤出賢良祠子鄂彌善現襲男爵

恭阿拉原名恭照鈕祜祿氏鑲黃旗滿洲五世祖巴圖魯一等宏毅公額亦都自有傳恭阿拉於乾隆三十六年由閑散承襲勳舊佐領四十五年補印務章京四十八年授副參領五十四年擢參領管理舊營房營總嘉慶四年正月授正黃旗蒙古副都統兼管右翼稅務二月調鑲紅旗滿洲副都統

賞戴花翎四月

諭曰前奉

皇考勅旨

孝淑皇后二十七月後

命立皇貴妃爲皇后今已屆期應卽欽遵

勅旨正位中宮皇后之父恭阿拉著照例封爲一等侯六月授步軍營左翼總兵六年三月調鑲藍旗漢軍副都統時步軍統領明安右翼總兵國霖私用步甲並分得摺雪賞銀惟恭阿拉名下查無跟隨步甲得銀之事

上嘉其尙知守法

諭將明安國霖交部分別察議議處尋偕明安等奏從前歷任步軍統領原有跟役三班每班二十名佔兵六十名經定親王綿恩奉

旨裁汰及布彥達賚面奏添設照前數酌減每班十一名共三班用兵三十三名今臣等公同酌議步軍統領每日查街查夜及叫堆撥柵欄等事需用步甲十一名兩翼總兵每日需用步甲七名逢該兵丁下班之期仍令回旗當差不得仍前作爲三班佔役至司員筆帖式雖亦有前項責任其每日查街查夜之

差卽由臣衙門當差步甲內酌撥二三名輪流聽事該員等所用兵丁全令駁出當差以歸覈實得

旨允行是月恭阿拉之父原任筆帖式恭保病故奉

旨照公爵分例給與卹典

賜諡恪愼九月調正紅旗滿洲副都統十一月因朝陽門外放米擠斃人口部議降三級調用除職任降調外應照例折罰世職半俸九年

上改爲革職從寬留任免其折罰世職半俸七年正月步軍統領明安於番役圖詐官員門鵠案聽情受賄恭阿拉未能查出實情交部嚴加議處部議降三級調用

諭曰恭阿拉於番役在外訛索未能查出實情本應照部議降調但此案番役初稟並未提及官員賄門明安聽情受賄各情咎尙可原恭阿拉著加恩改爲革職留任並

諭不必兼管副都統六月解左翼總兵事擢正黃旗漢軍都統命在紫禁城內騎馬十月授左都御史八年正月

上恭謁

東陵

命管理行在步軍統領事務十月

命兼攝京營左翼總兵九年六月調正藍旗滿洲都統十一月擢禮部尚書十年閏六月充會典館副總裁官十月授內大臣十一年十一月

命管理三庫事務充

玉牒館總裁官十二年八月授崇文門正監督九月

命護送

高宗純皇帝實錄前往盛京尊藏十月禮成交部議敘

賞加太子少保銜十四年十二月調鑲藍旗漢軍都統十五年

九月調工部尚書十六年二月

命承修

福陵石牌樓石獅子工程兼查驗盛京城工先是興京界所屬穆奇驛站被水沖淹房基不堪復建將軍觀明與侍郎薩彬圖先後奏到情形不符

上命恭阿拉等將應否酌撥官地另建之處妥議具奏尋偕觀

明奏此處驛站係爲恭送

永陵祭品及各項差務而設勢難改建他處請於原跣官莊地畝內酌撥六十畝除挪建驛廳及馬圈外餘地四十餘畝卽以補蓋衆丁房間其官莊額設地畝請交盛京戶部於就近上則餘租地內照例撥補俾資接濟差徭如此可於驛站有益亦於官莊無礙得

旨允行六月調兵部尙書充經筵講官兼管戶部三庫事務旋因失察轎夫聚賭部議降一級調用

上改爲降一級留任十七年十月調禮部尙書十二月因病奏請開缺

諭曰恭阿拉於嘉慶四年已封侯爵近年以來交派事件並無貽誤現在患病不能當差著准其開缺俾得安心調養並著加恩賞給三等公爵是月卒

諭曰恭阿拉老成謹厚奉職恪勤自簡任管理部旗十餘年來並無過失伊年甫六旬本年六月值伊生辰優加錫賚方冀精力健強長資委任遽嬰痺病未痊昨已加恩晉封三等公爵茲